

आकाशवाणी रायपुर (छत्तीसगढ़)  
प्रादेशिक समाचार (छत्तीसगढ़ी)

1810 रविवार

17.03.2024

प्रमुख समाचार –

- 1— प्रदेश म होवइया लोकसभा चुनाव म दू करोड़ पांच लाख तेरह हजार दू सौ बावन मतदाता मन करही अपन मताधिकार के प्रयोग।
- 2— महादेव सट्टा ऐप मामला म पूर्व मुख्यमंत्री भूपेश बघेल सहित इक्कीस इन के खिलाफ अपराध दर्ज।
- 3— कांकेर जिला म होय मुठभेड़ म सुरक्षा बल ह एक इन इनामी माओवादी ल मार गिराइस।

मुख्य निर्वाचन पदाधिकारी-पत्रकारवार्ता-01

भारत निर्वाचन आयोग ह देसभर म लोकसभा चुनाव के घोसना कर देहे। छत्तीसगढ़ के ग्यारह ठन सीट बर तीन चरण म मतदान होही। राजधानी रायपुर म आज एक ठन पत्रकारवार्ता म राज्य के मुख्य निर्वाचन पदाधिकारी रीना बाबा साहेब कंगाले ह बतइन कि प्रदेश म दू करोड़ पांच लाख तेरह हजार दू सौ बावन मतदाता हे। एमा ले एक करोड़ एक लाख अस्सी हजार चार सौ पांच पुरुष मतदाता अउ एक करोड़ तीन लाख बत्तीस हजार एक सौ पंद्रह महिला मतदाता हे। प्रदेश म सेवा मतदाता मनके संख्या उन्नीस हजार नौ सौ पांच हे। जबकि एक लाख इंक्यानवे हजार छै सौ अड़तीस दिव्यांग मतदाता हे। एखर अलावा सात सौ बत्तीस तृतीय लिंग के अउ सत्रह प्रवासी भारतीय मतदाता पंजीकृत हे।

मुख्य निर्वाचन पदाधिकारी ह बतइन कि प्रदेश म होवइया आगामी लोकसभा चुनाव के ग्यारह ठन सीट बर चौबीस हजार दू सौ उनतीस मतदान केंद्र बनाय गेहे। प्रत्येक मतदान केंद्र म मतदाता सहायता केंद्र घलो बनाय गेहे। उहें, लोकसभा निर्वाचन क्षेत्र के प्रत्येक विधानसभा क्षेत्र के तहत दस ठन संगवारी मतदान केंद्र होही, जेन ह महिला मतदान दल डहार ले संचालित होही। श्रीमती कंगाले ह बतइन कि पांच ठन आदर्स मतदान केंद्र बनाय जाही। अइसने सबो विधानसभा म एक ठन दिव्यांग मतदान केंद्र अउ एक युवा संचालित मतदान केंद्र बनाय जाही। सबो मतदान केंद्र मन म बुजुर्ग अउ दिव्यांग मतदाता मन के सहायता बर मतदाता मित्र होही। ओमन बतइन कि एक मतदान केंद्र म अधिकतम पंद्रह सौ मतदाता अपन मताधिकार के प्रयोग कर सकही।

मुख्य निर्वाचन पदाधिकारी-पत्रकारवार्ता-02

मुख्य निर्वाचन पदाधिकारी ह बतइन कि राज्य के पचास प्रतिसत मतदान केंद्र मन म मतदान दिवस ल लाईव वेबकास्टिंग घलो कराय जाही। ओमन बतइन कि पचासी बछर ले जादा आयु वाले सियान अउ चालीस प्रतिसत ले जादा दिव्यांगता वाले मतदाता अउ कोविड के संदिग्ध या संक्रमित मतदाता मन डाक मतपत्र के माध्यम ले घर बइठे ही मतदान कर सकत हे। एखर बर उनला निर्धारित प्रारूप म आवेदन करना होही। चुनाव ड्यूटी म तैनात मतदाता मन ल घलो डाकमत पत्र ले वोट देके सुविधा मिलही। एखर अलावा निर्वाचन कर्मी जेन मन अपने लोकसभा म कार्यरत हे उनला निर्वाचन कर्तव्य प्रमाण पत्र जारी करे जाही। जेखर ले ओमन अपन लोकसभा के कोनो भी मतदान केंद्र म मतदान कर सकही।

ओमन बतइन कि मतदाता वोट डाले बर मतदाता पहचान पत्र के अलावा आधार कार्ड, मनरेगा जॉब कार्ड, बैंक या डाकघर के पासबुक, ड्राईविंग लाइसेंस, पैन कार्ड, स्मार्ड कार्ड अउ भारतीय पासपोर्ट में से कोई एक ठन पहचान पत्र मतदान केंद्र म प्रस्तुत कर सकत हे।

बतादन कि छत्तीसगढ़ म पहलइया चरण उन्नीस अप्रैल के एक सीट बस्तर म वोट डाले जाही। एखर बाद छब्बीस अप्रैल के दूसरइया चरण म तीन सीट राजनांदगांव, महासमुंद अउ कांकेर म, उन्हें, सात मई के तीसरइया अउ अंतिम चरण म सात ठन सीट सरगुजा, रायगढ़, जांजगीर-चांपा, कोरबा, बिलासपुर, दुर्ग अउ रायपुर बर चुनाव संपन्न होही। एखर मतगणना चार जून के होही।

### ईओडब्ल्यू-एफ.आई.आर.

राज्य आर्थिक अपराध अन्वेषण ब्यूरो- ईओडब्ल्यू ह महादेव सट्टा ऐप मामला म पूर्व मुख्यमंत्री भूपेश बघेल सहित उन्नीस इन के खिलाफ नामजद अउ दू इन अज्ञात लोगन के खिलाफ एफ.आई.आर. दर्ज करे हे। ईओडब्ल्यू ह प्रवर्तन निदेशालय- ईडी के दे आवेदन पत्र उपर पाछू चार मार्च के अपराध दर्ज करे हे।

एफ.आई.आर. के अनुसार महादेव ऐप के प्रमोटर डहार ले ऑनलाइन बैटिंग ले मिले अवैध रासि ल कई ठन कंपनी, सैल कंपनी अउ शेर्यर मार्केट म निवेश करे गेहे। प्रमोटर्स ह अपन अपराध ल छुपाय बर कई इन पुलिस अउ प्रशासन के अधिकारी मनके अलावा प्रभावसाली राजनैतिक व्यक्ति मनके संरक्षण प्राप्त करीन, एखर एवज म उनला नियमित तौर म प्रोटेक्सन मनी के रूप म भारी रासि दे गीस। ए रासि के व्यवस्था अउ वितरण बर हवाला आपरेटर्स मनके संगेसंग पुलिस अउ प्रशासनिक अधिकारी मनके घलो उपयोग करे गीस। ए संबंध म ईओडब्ल्यू ह पूर्व मुख्यमंत्री भूपेश बघेल, रवि उप्पल, शुभम सोनी, चंद्रभूषण वर्मा, असीम दास, सतीश चंद्राकर, सौरभ चंद्राकर समेत इक्कीस इन के खिलाफ धोखाधड़ी, अपराधिक साजिश, जालसाजी सहित भ्रष्टाचार निवारण अधिनियम के धारा म अपराध दर्ज करे गेहे।

### माओवादी-मुठभेड़

कांकेर जिला म होय मुठभेड़ म सुरक्षा बल ह एक इन इनामी माओवादी ल मार गिराय म सफलता हासिल करे हे। पुलिस ले मिले जानकारी के अनुसार डिस्ट्रिक्ट रिजर्व गार्ड-डीआरजी अउ सीमा सुरक्षा बल-बीएसएफ के संयुक्त दल जिला के कोयलीबेड़ा इलाका अउ नारायणपुर जिला के गोमे, गट्टाकाल, आलपरस अउ काकनार क्षेत्र म तलासी अभियान बर निकले रिहीन। इही दौरान अचानक माओवादी मन ह घात लगाके हमला कर दीन। सुरक्षा बल डहार ले करे गे जवाबी फायरिंग म एक वर्दीधारी इनामी माओवादी मारे गीस। बाद म सुरक्षा बल के टीम ह घटना स्थल ले इनामी माओवादी के शव, एक देसी लांचर, नौ बीजीएल सेल, बारह कारतूस, एक वॉकीटॉकी सहित भारी मात्रा म माओवादी साहित्य बरामद करे हे।

### मौसम

प्रदेस के बस्तर, बिलासपुर, दुर्ग अउ रायपुर संभाग के कुछेक जघा म दिनभर बदली छाय रेहे के बाद आज रतिहा गरज-चमक के संग हल्का बरसा होय के संभावना हे। उन्हें, एक-दू जिला म हवा-गरेर चले गाज गिरे अउ करा गिरे के आसार हे।

उहे, काली अट्टारा मार्च के कुछेक जघा म हल्का बरसा होय या गरज-चमक के संग छींटा पड़ सकत हे। जबकि सरगुजा अउ बिलासपुर संभाग के कुछेक जघा म हवा-गरेर चले, गाज गिरे अउ करा गिरे के आसार हे।

मौसम विभाग के अनुसार प्रदेस म बंगाल के खाड़ी ले आवत नमी के सेति मौसम के मिजाज बदल सकत हे, जेखर ले तापमान म गिरावट दर्ज करे जा सकत हे।

## आदर्श आचार संहिता

भारत निर्वाचन आयोग डहार ले लोकसभा चुनाव के घोसना के संगेसंग प्रदेश म आदर्श आचार संहिता लागू होंगे हे। एखर तहत प्रदेश के सब्बो जिला म कलेक्टर ह अवइया दू महिना बर धारा एक सौ चवालीस लागू कर देहे। एखरे संग बिना अनुमति के धरना, जुलूस, सभा या रैली के प्रदर्शन बर रोक लगा दे गेहे। एखर अलावा अधिकारी-कर्मचारी मनके अवकाश उपर घलो प्रतिबंध लगा दे गेहे। आदर्श आचार संहिता के दौरान लोकसभा प्रत्यासी मन डहार ले शासकीय संपत्ति के विरूपण उपर, उंखर खिलाफ कार्रवाई करे जाही। अवइया लोकसभा चुनाव निष्पक्ष अउ शांतिपूर्ण ढंग ले संपन होवय, एखर बर जिला निर्वाचन अधिकारी मन ह सीमित अवधि बर वैध आग्नेय शस्त्रधारी मन ल अपन हथियार अपन क्षेत्र के थाना म जमा करे बर केहे हे। ए निरदेस ले बैंक के सुरक्षा गार्ड, वित्तीय संस्था मनके सुरक्षा गार्ड, संवैधानिक पद म आसीन व्यक्ति, राष्ट्रीय राइफल संग अउ जिला राइफल संग मुक्त रइही।

\*\*\*\*\*  
\*\*\*